

四庫全書

集部

欽定四庫全書

集部

明詩綜卷十三

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

謄錄監生臣楊恪

欽定四庫全書

明詩綜卷十三

翰林院檢討朱彝尊編

銚炳四首

炳字彥昂以字行鄱陽人明初獻書任中書典

籤出為大都督府掌記有春雨軒集楊廉夫云彥昂詩音

節甚古琅然漢魏之音危太朴云彥昂馳騁戎馬決勝籌帷有古烈士風故其詩悲壯沉鬱

宋景濂云彥昂工力既深摹擬輒似詩如璞玉輝春蠶珠浴月蔣仲舒云彥昂詩篇峻潔

尤多樂府清絕之氣可觀淒楚之調為甚既累簡質然亦非本語

靜志居詩話彥昂詩純效鐵厓宜鐵厓之傾倒也至其病過于繁艷特擇其淡雅者著于編

崩城操

朝從城上哭長城與雲齊暮從城下哭長城化為泥嗚呼城崩兮猶可築夫君死兮百身莫贖

春夕直左掖懷周侍御

一作郎

晚雨池上晴逶迤澹將夕金莖華月生綺樹流雲濕牕

虛漏聲永慢卷爐烟襲憶我同袍人何繇共瑤席

楊廉夫云

仿韋也

左掖門朝退呈吳待制

繆忝金閨籍聯班趨晚朝  
逶迤西上門窈窕長安橋  
殘雪帶遠樹夕陽明山椒  
不有同袍者疇能慰寂寥

別京邑之東阿

前年別鄉閭今年出京邑  
悠悠去江漢杳杳事形役  
所懼心志違况此風波急  
烏啼楓樹烟鴈下蘆洲  
夕回首望長安蒼茫寸心失

郭奎三十首

奎字子章以字行巢縣人明初朱文正開大都

督府節鎮洪都太祖命奎輔佐參謀及文正得

罪坐不諫誅有望雲集

王元美云參軍帥幕風流詞藻清麗究其品格

在張徐之次曹潔躬云參軍詩以骨勝一洗元人穠麗之習

詩話參謀詩格清剛句無浮響頗近汪忠勤

長相思

長相思  
小山下  
蘼蕪秋深沒  
行路王孫年年歸  
不去江

南水落天色寒鴻鴈滄波連日暮我思昔今金珮環  
人座上如花顏紫芝叢桂紛兩間下有流水清潺潺  
吹笙鼓瑟心常閒別來歲久鬢髮斑青雲猿鶴不可以  
企及魂飛夢往愁鄉關長相思何時還

烏夜啼

石頭城上烏遙夜鳴相呼紫清道士有兩樹烏啼不離  
樹高處千聲啞啞復萬聲中堂酒闌夢未成呼童把燭  
起開戶照樹惟恐鄰人驚庭前再拜向爾白我家舊住

長淮北慈親已老返哺違零落猶為異鄉客嚴霜滿地  
江月輝東方未白羣星稀明朝日出當早飛莫使涕淚  
霑裳衣

夜坐吟

江風蕭蕭吹古樹關山蒼茫海生霧北斗漸落明河微  
城頭烏啼天欲曙客子不寐憂無衣東征三年猶未歸  
蟋蟀在戶歲將暮洞庭霜白芙蓉稀男兒生當百戰死  
不執金吾即挾匕閉門勿用長夜歌騏驎終能致千里



擬古贈別

孟冬霜露降悴彼荷與蒲  
青青蘭蕙芳采之將焉如  
贈君夙昔意聊以慰斯須  
絃歌厲清響置酒岐路隅  
親戚念遠行各言勉良圖  
常恐不為樂日月方其除  
晨風奮高翼北林多古榆  
臨岐執子手安得同車驅

擬古思友

鷓鴣歲將宴蕙葭淒以霜  
思君隔山海道路悠且長  
睇彼參與辰清夜悲未央  
狂飈西北至一鴈方南翔  
言念

疇昔歡與子同衣裳安知異寒暑日月不我將天高則有斗川涉愁無梁憂心隱如怒出戶徒徬徨

送江彥英還錢塘

東南有高樓華日照綺楹瓊筵列海錯雜以絃歌聲疏簾卷晨夕迴看蒼江清君今利攸徃我獨懷鹿鳴執事望長路駕言出東城嘉會常不足何況臨當行晴郊芳樹碧綠渚春蘭生持觴意難盡相思空復情

紀夢

忽忽頽芳年搖搖寄行役寢興勞形神鬢髮玄已白驚  
風響庭樹憂思日恒積夢魂清夜歸彷彿舊鄉邑青松  
在園田桑柘蔭廬室飛鳥雲際還牛羊下來夕澄湖澹  
微波秋山有佳色雞犬雜比鄰墟烟靄阡陌怡怡兄弟  
情淒淒丘隴側臨流濯長纓挂冠坐磐石似慰平生歡  
覺來異疇昔百年如轉蓬萬物乃遺舄天命良在茲勿  
用云得失

寄陳教授敏

蘭葉欲覆階馨香襲芳室雨露之所滋惠風偃華質采  
采不盈筐薄言贈離析憂傷歲月愆同聲而異迹人生  
寄百年寒暑會有役歡樂難俱并浮名亦何益高誼諒  
匪他可以比金石

送王彬叔往同安

二首

駕言出城門遙望西南路別離良在茲嘉會不常遇置  
酒張瓊筵綢繆復凝佇飲餞未崇朝聊以慰情素翩翩  
白羅裳皎皎瓊瑤樹高步凌青雲豈為紅塵污春江及

信潮芳舟襲蘭杜小人衆所疑君子誰不慕久欲同車  
行攀轅莫能去惜哉苦淹留年芳易遲暮顧盼懷殷勤  
增我越鄉慮

南州亂無家寇盜縱橫馳白骨蔽原野火炎城與池千  
里何蕭條四顧令人悲倬哉皖公城當此江之湄崇墉  
上戕戕陣列紛魚麗明公秉高節德澤被華滋而蒙天  
子恩慰爾長渴飢大田既多稼王師良有儀君子利攸  
往樂土實在茲嘉賓復來集兼遂平生知春蘭麗芳渚

鳴鳳翔高枝徘徊岐路側未忍言別離別離何以贈再  
詠東山詩

從軍詩

朝濟彭蠡湖暮止匡廬山軍行飢且疲露宿聊解鞍方  
秋黍稷華徂征西南端奄忽歲云晏雨雪淒以漫擊析  
豈能寐哀哀想苦寒戰場久勞役裘褐俱不完鸛鳴在  
丘垤思婦應常歎誰無內顧懷受命誠獨難三苗阻聲  
教師出猶未還願公析天威戢舞羽與干上瞻太階平

下覩斯民安勞旋詠杖杜貽爾室家歡

滕王閣

西南有高閣下瞰滄江清飛闥百餘尺複道周四楹白  
日一何麗照耀丹青明借問誰所為云是滕王嬰壯哉  
大唐業封子臨斯城佩玉雜鳴鑾物換星亦更勝地罕  
常見賢者垂令名相公布文德復此嘉會并羣才若雲  
集頌以謳歌聲陽春不為樂萬物爭光榮登高矚曠世  
臨流忘濯纓再拜述短辭柱石齊天傾

送孫良玉還同安

送君江上去山路雨初晴落日平淮樹春潮帶皖城酒  
因今日醉人是故鄉情莫說王孫怨芳洲綠樹生

歲暮

寒月出在戶江城鴈獨飛愁人不能寐鄉淚忽沾衣  
隴十年別星霜兩鬢稀為言叢桂老歲暮憺忘歸

琴溪

吾慕琴高子於焉隱遁棲松雲生峭壁山霜漲迴溪古



迹行人識新春好鳥啼學仙誠有道安得謝輪蹄

五嶺

侵晨登五嶺石磴畏躋攀急雪沾衣白因風點鬢斑雲  
連秦劍閣天塞漢蕭關想見當時路班超奉使還

出暖水向新營

山陽暖水地舊是北軍屯一澗雲連棧千峰雪照門奉  
書觀壁壘馳驛到邊藩為卜歸人信今朝喜鵲喧

寄陳檢校

遙想紫薇省郎官直禁樓瓊花天上去清夜憶揚州二  
十四橋月玉簫吹兩頭秋風挂帆席幾度大梁游

中酒

春來中酒朝朝病擁被高眠嬾出門草沒漸迷湖上路  
花開未到郭西村湘娥有瑟催歸雁楚客無書託故園  
惆悵東風醒亦醉夢中常是賦招魂

游三門山

黃茅蓋屋石為門路轉溪迴更有村果樹連園收芋栗

豆花滿地散雞豚雲深易就漁樵隱山遠全忘市井喧  
何獨武陵堪避世此中佳處亦難言

宿雨

宿雨瀟瀟悴客心高牕連日滯秋陰一枝未遂鷓鴣託  
四壁應愁蟋蟀吟家在淮南青桂老門臨湖水白蘋深  
鯉魚風熟香杭早釣艇誰撐近竹林

重憶西巖訪舊

鷓鴣聲中宿雨晴白雲閒傍馬頭生東鄰茅屋新烟起

南澗石橋春水平野老見多還問姓山花開盡不知名  
故人宅近青松下未到柴門已出迎

寄劉彥基

二首

洪州別駕久相違驥足遲遲三月歸應被長干兒女笑  
春風不識繡羅衣

九月征人未授衣年年書到故園稀無情恨殺湘天鴈  
不帶平安二字飛

開歲卧病

多病文園渴未消自從人日遇花朝不知楊柳將春色  
綠到淮南第幾橋

贈陳教授敏

松樹連檐翠色多湖南春水澹生波貢家舊宅雲林在  
明月滿船聽櫂歌

贈白紵山菴道人楊玄中

四望亭前姑熟溪道人種玉住山西古松數株秋滿屋  
青鳥月明時一啼

德興山中

樹頭飛翠濕空濛茅屋雞鳴霜澗東  
好借吳興唐棣筆  
畫圖傳我是仙翁

銅陵寄劉知府

雙尊特為故人將江路風濤忽渺茫  
坐對銅官不同飲  
馬蹄明日又涇陽

早發分宜縣

夜半荒雞鳴遠村板橋斜出縣西門  
征人衣上霜如雪

猶未曾承國士恩

夏煜一首

煜字允中金陵人太祖下金陵辟為行省博士  
調浙東分省

哀孫炎

垂老戎馬間相知復何有幼與孫炎交於今俱白首炎  
也雅好詩落魄惟耽酒醉中有神助不放持杯手才豪  
不受羈焉肯事田畝精勤脫穎出盤錯迎刃剖浪迹帝

王州結交英俠藪咭咭朝陽桐濯濯新春柳南北暗兵  
塵妖星下天狗我皇入金陵一見顏色厚高談天下計  
響若洪鐘叩即拜丞相掾奉身事明后再分太守符兼  
綰都官綬括蒼實重地豺虎白日吼皇曰汝孫炎其往  
總制某再拜謝不敏寵命敢虛受一年風俗淳二年民  
物阜三年遠人歸上表請官守文章曹劉亞政事龔黃  
右舊歲過金華與炎適相偶寒燈夜半花春盤雪中韭  
終宴竟忘疲落月斜半占臨分各上馬攬轡復立久為



言有小女離家方襁負今來已五周見父能認否未必  
到家期封書附姑舅置書篋笥間纔隔兩月後墨色尚  
未乾語音猶在口胡為內變生哭我平生友復恐是夢  
中仰天當戶牖斗柄昏建辰月魄夕在酉乃知真死矣  
慟哭吞聲咤復聞遇害時扞刀落隻肘奮怒髮衝冠大  
罵血漂白維時東南天彗出芒如帚淫淫苦雨愁曄曄  
驚電走魂兮早歸來空山不可狃我過孰與規我病誰  
云灸春酒釀薔薇奠子墳山崕西京七葉貂零落成草

莽既有千載名焉用百年壽我我馮公嚴與子同不朽

熊鼎一首

鼎字伯穎臨川人吳元年徵授中書博士遷起居注出為浙江按察司僉事改山東副使拜晉王右傳除參軍授岐寧衛經歷召還至西涼為朶兒只把所害敕葬之黃羊川

上巳日浴溫泉

驪山宮殿鎖溫泉天寶遺蹤故宛然繡谷春融丹井火

金波月滿鑑池蓮  
玉顏承寵專恩澤  
翠輦來游惜暮年  
我亦逢時修禊事  
白頭空負麗人天

李應榮一首

應榮字顯道東陽人元末平江路教授同章溢  
謁太祖於軍門留參戎務以說降方國珍累官

尚寶少卿

詩話實錄說降方國珍為主簿蔡元剛處士陳  
顯再使為夏煜陳顯而尚寶此作見東陽歷朝  
詩

奉使塗中作

驅車出東郭，遠上天台城。  
峰高插霄起，屹立如迴屏。  
前塗在雲杪，彷彿秋蛇行。  
俯視萬壑底，澗水嘈嘈鳴。  
恍然心目眩，幾欲墮危崢。  
况兼風雨至，泥滑如飴飴。  
一步三退縮，戰慄若履冰。  
僕夫屢顛躓，行者難為情。  
神武恢疆宇，垂念及生靈。  
俾將誠信辭，以息東南兵。  
藐焉一小子，敢不來趨承。

劉駟一首

駟字宗道龍谿人洪武初倉攢以秀才徵試第  
一拜左都御史後坐事徙滇有愛禮先生集

詩話宗道講學遠師北溪其闢釋老甚嚴目佛  
為泥廝集中有同安歎云噫嘻吁紫陽之化衰  
家家阿彌儒也墨衣墨也墨衣滿城遊遨誰我  
知不如歸也不如歸又游天蓋寺詩云若無僧  
寺塔直是一唐虞斯亦能言距楊墨者矣

### 感興

浮屠日以興平地生棘刺大道為之荒聖門為之蔽嗟  
哉末俗流每每謂之是觀古聖賢人輒感多因爾寔予

魯且蒙奚為生此世發憤逐前修質弱安能至聖道雖  
云遠戮力應可致

丁麟一首

麟字彥祥海鹽人洪武乙丑進士除給事中改

御史坐法死

詩話武原雙丁兄麟弟麟嘉禾二王兄鏞弟鈞  
詩雖格調卑卑然先民有作鄉曲後學不可不  
為表章也麟字彥禎官至濟南知府詩如烟寺  
行吟云得句便題林外竹脫巾長挂塔前松送  
人云西山日薄烏啼急南國風高鴈影稀天星  
湖云隄畔馬嘶芳草碧沙頭人上畫船輕聞琴

村云別鶴不聞雲外語野  
鳥時向屋頭鳴亦能拔俗

西湖竹枝詞

湧金門外春水多賣魚船子小  
子梭三三兩兩唱歌去  
驚起鴛鴦飛奈何

曹介一首

介字子直永嘉人洪武中監察御史

金碧山水圖

唐朝以來畫金碧小李將軍稱絕  
竒流傳所見恨不廣

真蹟往往人間稀此景何人之所作老眼按掌看宛若  
羣峰削翠撐晴霄一水流銀出丹壑初疑武陵溪桑麻  
夾岸花枝低漁郎昔日訪奇處回首但見蒼煙迷又疑  
天台山桃花流水非塵寰仙人劉阮采藥去虹橋一斷  
難躋攀我生胡為在塵市一見青山心獨喜拂衣便欲  
歸故鄉高卧溪堂看雲起觴我酒絃我琴高山流水誰  
知音

許伯旅一首



伯旅字廷慎黃巖人洪武中官刑科給事中有

介石臺

徐子元云廷慎若天台鴈宕雄踞東南小杜之名豈容多讓

詩話天台林公輔嘗述廷慎論作詩之法矣其辭曰法可言也法之意不可言也上士用法得法之意中士用法得法之似吾詩幾用法矣如是而起如是而終如是而為開闔如是而為抑揚頓挫如是而為輕重高下意之所至辭必與俱固未嘗囿乎法亦未嘗廢乎法也古之藝人若庖丁輩隨其心手所出無他焉亦用其法爾由是而觀天下之術未有不用法而能神者也又論宋元二代之詩云人皆謂宋之文高于元元之詩高于宋殊不知宋之詩亦高于元也論詞語工麗立節瀏亮宋或不及于元至于說古今道事理輕重明白豈元諸公所能及宋哉其

言具有深旨宜當時有小杜之目惜其集不傳惟餘赤城續志所載寥寥數篇而已

畫馬

曹韓畫馬久絕筆近代狀者多駑駘毫端不得千古意  
孰識世有真龍媒圖中此馬何所似人言昔產余吾水  
一聞高價傾千金更覺雄心少千里雙瞳爍電筋權奇  
索不可繫何言宮變化應隨霹靂去死生或與英雄期  
涓人買骨吁可怪漢武勞師動橫潰豈知神物在人間  
驪黃迴出天機外我生愛馬癖莫醫眼見畫圖神欲飛

榮河真種當可致西坂弱水扶桑歸

吳去疾一首

去疾字去疾安慶人給事中

詩話去疾列朝詩集不載其官闕考實錄吳元  
年十月帝御戟門與給事中吳去疾等論政務  
又嘗為  
議律官

春日雨中示友人

二月已過三月臨茅堂寂寥長晝陰梅花白白落已盡  
楊柳青青渾未深何日新晴出山郭及時行樂稱春心

應須載酒窮幽賞  
爛醉扶肩過竹林

陶 誼 一首

誼字漢生天台人官員外郎

山居

烟蘿寂寂陰柴扉  
路入蒼苔一徑微  
江燕定巢來自熟  
巖花結子落還稀  
修琴有制先鈔譜  
沽酒無錢更典衣  
采藥山童終日去  
夜深常與鶴同歸

張 適 十首

適字子宜長洲人洪武初以秀才舉擢工部都水郎中以病免後復舉明經授廣西理問歷滇池魚課宣課二司大使卒于官有甘白先生集

陳嗣初云甘白先生詩發纖穠于簡古寄至味于澹泊

詩話子宜免都水郎歸即朱長文樂園故地居之詩所云坊存前哲號屋貯古人書也一時名流都為題詠見鐵網珊瑚詩有樂園江館南湖江行滇池等集煨于火其孫祝得十之二三于煨燼之餘及士林傳誦之作合為甘白先生集今雕本已罕傳予從其後人星借觀錄之

雨中對齋前楊柳賦楊之枝二章

楊之枝我不如子無知我心之憂曷其已而  
楊之花我不如子無家我心之憂曷其有涯

擬古

我馬既已秣我車亦已膏游子志遠行豈憚終夜勞海  
水自言深泰山自言高去去涉長道歲月疾如埽譬彼  
風中花衰謝不復好惟有惓惓懷日夕不離抱

別張訓導

近識張夫子情深似故知何須雞黍約已有鹿門期此

別五千里且論三百詩舟行在明發雲樹渺相思

對雨

住近南塘柳蓋扉涼風送雨薄絺衣檐花暗應鄰春下  
沙鳥明隨估舶飛蝸篆登牀延筆格燕泥上壁污琴徽  
蒼苔駁石林間路一月春陰客到稀

山中春盡

蘿磴松巖百摺斜清溪窈窕有人家樹深風送還山鶴  
石上泉流出洞花就竹編籬防早筍當牕出火焙新茶

門前過澗崎嶇路安得能來長者車

題山水小幀

秋林雨過雲猶濕綠莎亭子小於笠  
漁榔欲來猶未來  
隔隄驚起雙谿鷗

翠岫樓臺圖

巖下樓臺擁翠霞千章嘉樹蔭紗曲  
闌干外東風急  
人隔珠簾看落花

題畫卷



青山歷歷樹重重寺在雲深第幾峰  
比屋人家西崦下夕陽長聽講時鐘

過朱卿宅

鎖却城東燕子樓荒村漂泊幾春秋  
如今占斷沙河曲更嬾全家上小舟

楊 晏 二首

晏字宗晏餘姚人洪武中以人才舉為沔陽倉  
副使遷都察院司獄調長泰主簿以獻詩擢吏

部考功主事謫居滇南有鳳臺貴竹東屯南游  
諸橐

詩話楊君傳詩不  
多頗饒跌宕之趣

雪溪翁山居圖

門前野水可通漁雲裏草樓方著書好山誰臨北苑畫  
斷橋我憶西湖居塵埃自著鷗鷺外霜露正當鴻鴈初  
為報秋風搖落早梅花消息近何如

南城偶題

城南好山何太幽人家對門溪水流春禽啼樹野花落  
雪瀑挂厓嵐翠浮長鏡自可斲靈藥短筇何必尋丹丘  
一聲清嘯暮天碧松頂月明人倚樓

戈 鋤一首

鋤字仲京鎮江人洪武初徵士官禮部主事有

鳳臺集

詩話仲京詩  
原出于溫岐

題野塘秋景

芙蓉秋色滿銀塘  
白鷺雙飛下晚涼  
記得采蓮看越女  
醉騎驕馬觸垂楊

范準一首

準字平仲休寧人  
洪武中舉明經官至工部主事  
有壘甕西游何陋軒諸稟

松蘿谷

尋幽興未涯  
窈窕入深谷  
長松生晝寒  
香蘿蔓春綠  
繇繇石上葛  
冉冉籬下菊  
樵子時相逢  
和歌自成曲  
吾將

從杖屨題詩滿青竹

朱逢吉一首

逢吉字以貞崇德人洪武中官大理寺丞

寄張世衡

文穆公家四世孫清朝今見幾人存  
衣冠入市爭投刺  
風雨讀書深閉門  
坐詠遠山楓葉寺  
歸從新酒杏花村  
玉灣橋下莓苔路  
應有徵車故轍痕

冷謙一首

謙字啓敬嘉興人洪武初太常司協律郎

詩話世傳協律仙去嘉興府治東北碧潏坊建祠祀之里人禱夢多驗祠三面距水今為土填  
湊矣協律著作罕傳僅從郁氏書畫跋錄得一首

題燕肅山水卷

依稀廬岳高僧舍彷彿商山隱者家我亦抱琴來谷口  
白雲深處拾松花

桂  
慎一首

慎字宗敬慈溪人洪武中官中書舍人謫戍雲

南臨安府

登太華山寺

昆明池上古招提樓閣參差近碧雞為愛白雲分半榻  
却隨明月過雙溪風前松子當牕落雨後苔衣拂石頤  
如此清幽好樓泊為誰又度澗橋西

朱芾一首

芾字孟辨以字行松江華亭人洪武初徵授翰林編修改中書舍人

詩話明初詩人善書法者正書則楊孟載張翔  
南行楷則唐處敬張藻仲草書則宋仲溫周履  
道章草則盧公武隸則吳主一邵復孺大小篆  
則張士行宋仲珩而孟辨名尤在諸子之上嘗  
以所書瘞之細林山中題曰篆冢董徵士良用  
贈詩云華亭朱茂才好古喜欲顛一掃世俗書  
習篆忘食眠秦望并之宋碧落兼新泉小者案  
間列大者屋壁懸平生囊橐資多充買碑錢功  
深學既精齒壯志逾堅池魚染皆黑鐵硯磨將  
穿摹搨累萬番期差古人肩師法正在茲什襲  
比蹄筌孫樵文自祭智永筆忍捐嗟我細林山  
角之瘞其顛聚土封若堂饒石表為阡寶劒賈  
胡發玉押蔓草纏何如篆塚光夜映列星躔錢  
提舉思復歌云雲間苦嗜古手授科蟲辨魚魯  
明牕淨几風日佳臨摹一掃千番楮商彝周鼓  
真吾師蠕扁沉著沙畫錐鸞迴鳳翥龍天橋長



戈短劒相交馳書草日積充棟楣保愛何啻璧  
與珪細林山中一杯土細笈絨膝重閉之合學  
士灘哥石硯篇誦  
之可謂好事者也

賦得秦淮送宋仲珩

春漲曉沄沄空明澹孤嶼中流送行舟綠波渺南浦鷗  
從青鏡下人立滄溟語素潏漾涼颺員紋散疎雨桃葉  
懷舊題後庭歌弔古因之寄離情前洲采芳杜

宋璩一首

璩字仲珩浦江人學士瀛仲子洪武九年召為

中書舍人

詩話仲珩受業于趙古則故精于六書南村稱其大小篆純熟安媚行書亦有氣韻今誦其五言離奇安帖惜不永  
天年兼為書法所掩

寄章允載兼簡項思復

憶昔別京畿與子寓官廨一見即相驩不翅舊交快維時因道塗驅車久行邁忽逢弛擔初欣若身脫械握手坐甍觥軟語慰疲憊情投比黏膠意愜甚搔疥項君數過予滯下喜方瘥三人互談噓何殊合糾繡驂鑣出游

行古蹟探奇怪路入青蓮宮駐足聽梵唄薄晚始旋却  
傾倒形忘瘵周詳論書譜從容說詩派凡習尚浮華遺  
音日已壞作者固繇夥咸韶混夷黷瀾倒并波隨疇能  
抹危敗顧予樗散材頻年處卑隘朽鑿卑方員甘遭世  
俗賣人將競嘲譏子乃敦教誠苦言加箴規默默使心  
解酒酣示新篇辭源極滂湃却類任公子投竿下羣牯  
應知藝嘉禾薈治絕稊稗讀之神駭驚秋蛩罷嘶喝政  
圖藉薰陶別還隔遙界欲叩寢食安但復占爻卦浦汭

守衡茅無從豁矇瞶譬諸鐵在爐伊誰鼓風鞴况乃患  
沉疴軀命猶纖芥侵尋閱暑寒孱弱乏剛夬精神盡凋  
耗面目多腫黧布衾暖閣眠藥貼晴簷矐年來獲告瘳  
書齋仍埽灑援鶴亦爭慶似索煙霞債綴賦詠雕蟲攻  
篆學垂薤有時看飛泉四山寂無思取古遺經一覽  
適炙暍蘭膏繼日晷矻警昏懈視已常欲然進業慙  
質齷志須成絲泉未能脫管蒯篤信宴安中懷毒劇蜂  
蠆蚤暮自深省此語諒非衡近聞子亦歸親朋樂情話

千里感遺書殷勤持一介而翁幸康彊愧缺沐下拜執  
簡立臺端百士不敢笑道遠竟莫前動若飛駟鍛歲月  
無停輶季秋倏已屆籬菊傷雲肥江山日如畫軒車幾  
時來夜雨一燈挂明德正可崇相期各云勸

史靖可一首

靖可鄞縣人中書舍人

詩話潛溪之歸也孝陵諭之云大江春來風浪  
多宜就裏河達于家靖可送行詩益賦以紀實  
也靖可以吏部奏差洪武九年十一月授中書  
舍人載實錄滎陽外史集有史行可文可殆其

昆弟  
行

送宋學士

君王親為計歸程  
幾日攜家出鳳城  
江上春來有風浪  
扁舟好向裏河行

谷 宏一首

宏閩人

一云新  
淦人

中書舍人

行經華陰

崔嵬太華出雲中  
積翠遙連渭水東  
秋色萬家連遠塞

暮烟一帶遠離宮秦關日落行人少漢時天陰古殿空

寂寞武皇巡幸處祠郊木葉起秋風

李舒章云是錢劉高調宋轅文云

調既不卑景色亦合

陳潛夫一首

潛夫字振祖錢塘人官國子監學正

詩話吳人朱景春名所居之軒曰安分滕遠為寫作圖題其卷者甚衆潛夫及田子貞詩差優

潛夫于洪武十八年二月曾上書言事載實錄

題安分軒圖

一自幽棲白板扉，略無塵夢到輕肥。  
摩挲老眼臨書卷，抖擻閒身稱布衣。  
風竹翠迴琴響近，雨苔青滿屐痕稀。  
客來况說雲山好，處處春苗長蕨薇。

莫士安一首

士安名伋，以字行。更字維恭。歸安人。洪武初為府學教授，遷知黃岡縣事，入為國子助教。

詩話：士安集不傳，僅見于《湖海耆英詩集》。其《湖山圖長歌》則從吾鄉郁氏書畫題跋中錄之。永樂初，以助教治水江南，遂僑居無錫，自稱柏林居士。又號是菴。載《縣志》。流寓門今人罕有知者。



附識  
之

洪武丁丑春題王叔明湖山清曉圖

青山屏列水涯畔白雲練繞山腰半分明曉色澄素秋  
顛倒湖光接銀漢江霞滅盡海曠生巴雪銷多沔水泮  
岌嶭巔崖高莫梯回合源泉淨堪盥天遠匡廬秋杳冥  
雨足沅湘春瀚漫濃于藍汁可染衣赭若童顛未加冠  
盤谷繚通百折深緱嶺危撐半空斷澗橋蔭合踏新涼  
渚閣香凝坐平旦短屐扶藜野興濃輕舸聚網波紋散

南灣農鄰猶閉關西崦人家未炊爨僧寺樓臺松滿林  
漁屋軒牕柳遮岸陶令秫田誰為耕邵侯瓜地親將灌  
種桃莫問武陵津采芝偶得商於伴書封鴈帛感蘇卿  
鱸斫鱸絲羨張翰濯纓欲待滄浪清挽衣空歌白石爛  
樹樹巖花嵐霧重葉葉汀蒲水風亂蛺蝶暖依芳草飛  
鷓鴣晴入叢篁喚荇藻翻容避釣魚杉柵不借尋巢鶴  
壁帙芸枯粉蠹生岫幌藤穿蒼鼠竄翠墮梧桐借翦圭  
累結絲蘿愛垂幔米家尚存書畫船吳綾不減錦繡段

人來西北淹壯遊地擁東南隔奇觀標靈顯秀環故居  
汎影浮暉在吟案誰能高深故不兢我為登臨每無憚  
當時對景真彷彿遶次圍闌舊凝翫丹青物色眼停瞬  
鐵石心腸顏為汗蹤跡頓忘今昔非記憶方驚歲年換  
半生自笑不歸去兩足其如有羈絆泉石膏肓百慮增  
塵土心胷一朝澣湖山如此慰相思天地茫然寄長歎

繆天自云長篇用韻  
深穩非作家不能

李 畢 三十三首

畢字宗表錢塘人洪武初國子助教有草閣集

徐大章云宗表詩緣情拍事機動籟鳴無窮按苦索之態而語皆天然不煩雕刻朱伯清云

宗表善為詩精熟清新氣雄而詞暢一出李杜二公機軸蘇平仲云草閣詩多合乎三百篇

格律與李杜不遠

詩話草閣得詩法于李季和然季和猶為廉夫薰染草閣歌行則一氣孤行獨開生面正如淮陰之師多多益善囊沙拔幟辟易萬人當時四傑十友二肅二玄各有標榜如此逸氣高格顧詩家月旦不及焉信夫知音者之難也

古詩

吾觀詩三百豈徒正而葩其言本情性反覆成詠嗟二  
南乃其端列國多淫龜洋洋雅與頌制作功尤嘉善者  
固敦厚惡者亦紛拏聖人示我要蔽以思無邪

菜圃為鄰畜所殘

孟嘗久不作吾徒食無魚長齋坐清晝賴此田中蔬僕  
夫勤灌溉引水通溝渠青青日已長盡是辛苦餘封豕  
從何來游食良可吁一殘枝蔓傷再則根柢除遂令蒼  
翠場轉盼成空虛嗟我在羈旅草野聊暫居惜無專戮

權悵望徒跼跼將奈何屏棄輶與鉏學圃聖所鄙  
且讀窗下書

發雙溪

峩峩金華城行李何淹留閏十月初吉始能具扁舟輝  
輝晴旭升莽莽寒烟收篙師戒晨發浩嘯當中流揮手  
謝送者此行實夷猶昔為山林居今作江海遊撫心媿  
麋鹿放跡同鳬鷗丈夫旣許國生理焉得謀功成纔拂  
衣庶以追前修

泊鷺鷥灣

朝辭婺女城暮泊鷺鷥灣鷺鷥暝不見但聞水潺潺水聲日西流客子何時還長風吹征衣慘澹生愁顏

息灘

息灘復息灘逆上如登天舟行勢齟齬百丈不可牽人持白木篙左右拄兩肩倒緣凌風檣俯貼衝波船分寸累丈尺始能就其顛回顧望來者相去一丈懸我生匪利涉坦易性所便因之戒行險庶茲遠游篇

嘉禾

晨發嘉禾城晴日舒我顏水深野岸濶驛古秋花斑回  
頭拍點中已過三塔灣少年所游地頭白今始還沙鷗  
喜我還來往清波間願為忘機翁與爾俱投閒

遣瘧鬼

汝本顓頊子變化逃其形胡不肖厥祖騎龍升帝青而  
為瘧鬼徒屑屑居滄溟復游人間世所在行威靈坐令  
命蹇子狼狽汝所丁其寒誰致然其熱孰使令淒淒挾



絮纒喘喘思風亭肉黃面亦皺呻吟不可聽巫師用桃  
茆醫師進豬令汝黨固蟠結百執無一寧嗟汝聖王裔  
區區獨伶俜遷居迺令德肆虐非常經我今賦新詩送  
爾揚歸舲東方有蒼龍鼓腹生雷霆西方有白虎利口  
惟臙腥赤鳥司南方丹砂耀修翎玄武在北門閃目光  
熒熒四方汝無往恐汝罹天刑汝宜返故鄉寒泉肅泠  
泠綠荷以為衣丹霞以為扇珠簾水晶幌貝闕琉璃屏  
飄飄曳鸞旗洋洋下雲輶速行如風火晝夜不可停從

此勿回首一去三千齡

墨梅

烏不涅而黔鵠不浴而白其類雖有殊各以見真色畫師亦何心變幻隨世惑展圖對梅花為爾心惻惻

言懷

今日忽不樂少為川上遊童冠相追隨衣服紛好修紆徐既就坂崎嶇亦經丘是時鳴雨餘氣候如清秋嗒然拄孤藤聽此涓涓流往者既云邁來者無時休周流信

無滯至樂常悠悠俗士勿與言永為智者謀

逃難

四郊日多壘勞生信乾坤朝來有警急鐵騎如雲屯  
賤子心實憂焉能守荒村呼兒戒行李一飯同出門  
路逢逃難人紛紛亦來奔或扶爺與孃或挈子與孫  
十步九顛躓欲哭聲復吞間道往方巖前後相踴喧  
牛羊亦隨逐飛橋為之翻我行已巖頂我僕猶巖根  
脣乾吻亦燥何處濁酒樽茲巖既云險况有靈祠存  
棲遲且茅屋生

理安得論俯視西北隅殺氣猶昏昏

寄太平諸友

昨日東風吹雨過正值山齋罷書課無官可守真自得  
有酒不飲誰能那此時況當春夏交綠盡園林安敢唾  
出泥已誇籬筍嫩入饌頗憶溪魚大花間紫騮來幾匹  
葉底黃鸝鳴兩個桃巖諸公多俊才遠來相就同賡和  
野人擬作韋曲游諸公忍復東山卧誰謂更深雨復作  
到曉打牕驚夢破寧愁烏帽顛風吹尚恐蠟屐春泥浣

拈毫惆悵題我詩天晴更為斯文賀

贈地理遠碧山

澗東瀍西曾卜洛定之方中楚宮作當時相宅論陰陽  
猶未經營到冥漠後來注意馬鬣封某丘某水尋靈蹤  
封侯作相在頃刻芒屨踏遍青芙蓉遠師本有降龍技  
隨處看山逐龍勢金華一郡凡幾家屢見牛眠得佳地  
我家近住東屏山時與遠師相往還青囊和月挂松樹  
且酌美酒開心顏我聞金陵帝王宅虎踞龍蟠出奇特

遠師飛錫宜一遊歸來說與漁樵流

踏車行

南岸北岸聲咿啞東鄰西鄰踏水車車輪風生雷轉軸  
平地雪寒生浪花借問老農何太苦低頭欲語還咨嗟  
前月有雨田未耘非其種者紛如麻縣吏捉人應差役  
令嚴豈得營私家況當今日滴雨無陂塘之水爭喧譁  
雖如抱甕沃焦釜蹄涔豈足供泥沙語罷踏車車轉急  
田水何如汗流濕老妻貸穀猶未歸力疾無奈吞聲泣

喜雨行

五日不雨中禾焦十日不雨晚禾死農夫田父心煩勞  
桔槔捐捐徒為爾俄然雲起從西北一片飛來頭上黑  
六丁雷斧開天關不盡天瓢瀉甘澤沛如萬頃之銀潢  
疾如江漢流湯湯怒如平龍騰變化颯如白帝行秋光  
在坑滿坑谷滿谷此雨何如雨珠玉甌窶汙邪無復分  
但見芄芄稻花熟東家老翁賒酒勸西家女兒賣釵釧  
青黃未接渾未憂屈指豐年眼中見我歌不獨如元豐

我歌直與康衢同此身願作飯牛翁耕田鑿井堯無功  
嗚呼耕田鑿井堯無功

誕日醉吟

先生今年五十一兩鬢雖斑眼如漆挑燈終夜何曾眠  
細字蠅頭看書帙既不能握蘭起草趨明光又不能塞  
旗斬將赴敵場布衣十載困江海空有崢嶸磊落驚世  
之文章近來結屋翠峰下白雲遶屋看如畫王侯卿相  
不到門自與農夫作鄰舍蝱浮缸面新酒渾清晨上壽



誰稱尊阿兒拜前女拜後此樂欣欣難具論盤餐昭眼  
復何有出甕黃塵間青韭山田放豚初告臍潑刺鮮魚  
貫霜柳須臾剥剥啄啄叩門聲攜肴載酒來諸生陶然  
洗琰復更酌百川一吸如長鯨我醉欲眠卿且去謫仙  
未得其中趣玉山雖倒嗔人扶染筆從容賦長句我不  
願二十四考為中書我不願千二百歲崆峒居但願百  
年三萬六千日日日醉吟歡有餘

北上行送周士約

停君鐵如意飲我金叵羅我有北上行起舞為君歌念  
此北上樂君行莫蹉跎披雲登太行敲冰渡黃河黃河  
連天與天碧織女大笑投銀梭紅雲暖光開玉闕流星  
煌煌夾明月蕭韶之音下紫清太液恩波流不竭去年  
前席召賈生今年上書薦禰衡鵬搏虎變不可測布衣  
談笑為公卿為公卿吾道昌丈夫壯游須帝鄉紅顏才  
子青雲郎文光照曜宮錦裳紫駟馬肥金鞍光蓮花匣  
出三尺霜黃金臺高天中央紫琳作佩聲鏘鏘聖主恩

深誇陶唐好賢不數燕昭王  
北上行君莫忘

九鷺圖

何人水墨開毫素  
白日晴牕起烟霧  
強將醉眼窺微茫  
乃見江南九秋鷺  
兩隻長鳴一隻飛  
兩隻共啄菰米肥  
其餘四隻夢洲渚  
黃蘆白葦相因依  
我家曾住苔川上  
綠蓑披雨聽漁唱  
西塞山邊今有無  
桃花流水應新漲  
別來幾載棲林巒  
身欲奮飛無羽翰  
卷圖高詠風漠漠  
憶爾磯頭青釣竿

胡將軍歌

胡將軍邦之良武之豪身長八尺面如鐵敵人見之凜  
凜生寒毛憶昨辛卯歲九州沸鯨濤蒼生日塗炭呼天  
雨泣何嗷嗷吳王氣宇真天人手提秋水三尺之豪曹  
貌貅萬竈會滁上左右環列俱賢髦將軍謁轅門開口  
談六韜為王之爪牙出入行陣躬韃橐疾如風雨飛千  
艘王命胡將軍蜚弧蜚弧爾所操義聲西來動白日電  
光閃爍搖旌旄金陵宣城不日得徽州嚴郡隨風逃洞

兵三萬餘刀鞘弓藏歿靈旗却拍金華城父老爭先持  
酒烹喉衿閩楚信州地將軍又為殫力營城壕乃從元  
戎上台鼎橫金拖紫獨立青雲高將軍未下車民庶憂  
忉忉將軍既下車所犯無秋毫健兒不敢忤民意酷吏  
不敢按民膏男兒務農耕婦女勤蠶繅將軍為之垣墉  
使民厚民適自樂將軍勞兜鍪貂蟬本無異擬變方名  
為夔皋嗚呼壬寅春二月肘腋禍所遭三軍盡躑躅萬  
姓皆號咷朝廷聞之為痛惜遣中使降丹詔遂有光祿

大夫越國之崇褒有廟有廟依巖嵒春秋二時祠太牢  
吹笙鼓瑟兼伐磬玉杯春酒醺蒲萄畫梁文拱倍輝赫  
焚香彷彿來蒼蒿英姿颯爽毛髮豎陰風吹動團花袍  
殿前近侍捫錦條壁上先驅腰寶刀出師或銜枚班師  
或鳴鼗將軍雖死有餘樂魂魄上與星辰遨有子有子  
如將軍志欲與國除腥臊鄰敵侵我疆勇捷如飛猱奮  
身與之戰以一當百戰已鏖將軍陰兵實助之似聞人  
馬聲嘈嘈敵驚靈火徧原野如中羽鏃相呼號我來祠

下謁遺像秋林葉落風蕭騷雄文大字紀顛末翠珉已  
載黃金鼇嗚呼胡將軍生為名臣死廟食勸忠之作吾  
其叨

題烟波疊嶂圖

憶昨扁舟上南斗順風看山如馬走前山在眼後山失  
紫翠繽紛紛落吾手當年見山如畫圖畫圖得似當年無  
臨軒把玩笑絕倒蚤覺詩思生江湖江風蕭蕭煙水暮  
盡是漁翁釣魚處安得身輕如白鷗江上飛來又飛去

題胡濟源聽泉樓

冷泉亭子深且幽我昔杖履曾追遊山中正當朝雨霽  
坐聽泉水涓涓流初如松風灑萬壑忽如仙珮鏘鳴璆  
又如蛟龍起潭窟霹靂閃電摧林丘黃猿抱子挂秋影  
良久不下聲啾啾是時同行四五人相對毛髮寒飈颼  
乃知福地難久住却載酒壺登綵舟故鄉一別幾十載  
江湖浪迹如沙鷗風塵瀕洞箭滿眼欲歸洗耳嗟何由  
飛來山色入我夢碧松丹桂枝相樛每逢泉石必宿留



題詩感慨無時休胡公亦是聽泉者胸次磊落非常儔  
何當暇日登君樓與君作記樓上頭

題鍾馗移家圖

綠袍進士掀怒髯飢來嚼鬼如蜜甜酸風苦雨攪白日  
移家欲往山陰尖隨兄小妹臉抹漆眼光射人珠的皪  
鬼奴鬼妾千萬形蟹怪貓妖最蕭瑟勢能使鬼鬼不違  
髑髏在後嗤鍾馗英雄如山堆白骨莫倚區區手中笏

青山白雲圖

若有若無青山之嶙峋欲斷不斷白雲之氤氲往往何  
人得此意高公彥敬下筆藝絕倫我歌紫芝白雲裏白  
雲却向青山起裁雲為我衣推山作我几松花釀酒三  
千石醉後高歌歌未已歌罷仰天笑此樂人中仙心搖  
赤城霞目斷蒼梧烟左執容成袂右拍洪崖肩五雲之  
佩何翩翩乘風欲往蓬萊巔蓬萊巔渺何處金銀樓臺  
隔煙霧青鳥銜書海上來千歲胡麻欲成樹悵不往兮  
心茫茫雲浩浩兮山蒼蒼人間亦自有真樂還君之圖

今贈君青山白雲作

題五馬圖

開元四十萬匹馬誰是超然出羣者曹韓筆力非不工  
須信真龍最難寫真龍只有拳毛騶太宗騎此開唐家  
雄姿猛氣世無敵當年識者久歎嗟吳興公子畫五匹  
滿眼風雲起蕭瑟一匹玉花鬣且驕一匹飛黃甚飄逸  
駁文殊者一匹雄一匹紫電奔長虹中央正立一匹胡  
青驄遂令四馬皆下風想見承華春首著此馬由來字

天育殷紅盤袍帽紋縠奚官杖策來監牧花萼樓前風  
日遲五王宴罷何逶迤乃知畫師用心苦俟我落筆題  
新詩

送胡季誠北上

杭州從士真文儒乃是丹山九苞之鳳雛春風歲筵開  
玉樹明月皎潔涵冰壺伊昔跨馬遊京都翩翩采服親  
庭趨太常博士衆所敬儀表自與常人殊嗚呼耆舊今  
已無空餘故宅臨東湖嗟余避地頗相見不得再見成

長吁山中六月火雲熱多君為我來肩輿衣冠如覩太

常面令我舊事懷姑胥

自注昔與季誠尊翁古愚先生會于楊廉夫姑胥寓舍

呼

兒出為佳客拜遣僕往問香醪沽黃雞啄黍或可餉青

韭翦雨時堪須夜深秉燭忘夢寐脫巾且挂長松株酒

酣慷慨肝膽露駕言欲問青雲塗飄然挂席上北斗海

濤日出扶金烏觚稜翹首天咫尺五雲深處陳嘉謨先

公餘澤猶未已青檀故物還須臾青檀故物還須臾此

行善保千金軀

題陳世恭所藏山水圖歌

米公老手無人繼從此乾坤少清氣畫師落筆頗似之  
素練曲折開秋意上有青山萬疊之嶙峋下有白雲千  
頃之氤氲丹楓翠柏森左右年深乃成十抱文白石坡  
頭野亭小一葉漁舟蕩清曉對岸想像忘機翁坐石蒼  
苔談未了我嘗四載客京華每見畫圖成歎嗟垂老歸  
來愛幽獨欲借雲根半間屋

題南山獻壽圖

將軍落筆怪且雄能寫嵯峨峯律萬仞之奇峰模糊猶  
含太古色慘澹頗帶清秋容儼如蓬萊三山翠且重又  
如廬山五老削出金芙蓉千盤萬轉不可測恍忽雲氣  
隨飛龍下有衆瀟之流泉上有偃蹇之長松松根羽人  
顏色好抱膝盤陀事幽討云是南極天邊之壽星遨遊  
先天後天老被以青霞裘蔭以白羽葆龜游綠沼沉滄  
波鹿放蒼厓食瑤草有鶴有鶴飛且鳴雪衣丹鼎隨風  
輕兩鶴飄然入紫清一鶴獨立和以簫韶聲手拈雙青

童載以白玉笙上朝三十六帝京五雲仙樂來相迎玉  
女投壺其聲錚錚白兔擣藥使人長生胡君欣得之喜  
氣何盈盈是時七月涼風生君來飲我黃金觥酒酣再  
拜求我歌須臾落筆雷霆轟五岳為之動三江為之傾  
此圖足為仁者壽題以南山獻壽之佳名胡君胡君宜  
愛惜我歌歌罷千金值挂向高堂雪色壁夜夜虹光射  
天赤

煮豆酌白酒歌

戊戌  
前作



煮豆酌白酒豆肥酒氣溫相對二三子其樂難具論君  
不見曉來雨過東家村叢叢豆莢生籬根阿翁提籃跣  
雙足采摘采摘呼諸孫歸來笑指老瓦盆酒波猶帶新  
糟渾田家酒具如窪樽一盃入口春無痕兩盃三盃鯨  
濤奔四盃五盃和江吞須臾飲至百十盃眼花耳熱低  
乾坤憶昨豺虎如雲屯旌旗滿目烟塵昏殺人如麻血  
成海十室九家無一存大臣自合死社稷况叨厚祿承  
君恩近聞省府日筵宴椎牛宰馬齊崑崙吾徒布衣在

草野憂心惻惻懷至尊  
嗚呼蕭艾滿城邑馨香不數蘭  
與蓀呼童煮豆復進酒呼兒為我關柴門

王子約雙鉤竹歌

王君金華人畫竹誇當代此竹乃是鉤勒之所為坐上  
千人萬人愛愛君為人清拔俗興來踏遍實箇谷籠鍾  
桃枝紛入眼節簾笆簾常經目往年曾見吳門道士張  
溪雲歸晚軒中事幽獨有時不作山水圖戲拈銀毫書  
此竹王君筆法乃過之比似張生更神速王君寫竹能

寫形脫略粉墨辭丹青或如金錯刀或如鐵鉤鐔或如  
銀幡寶勝之飄飄或若金節羽衣之婀娜或如白鳳尾  
或若蒼龍擎天機逞其妙形狀何瑰奇唐時亦有蕭協  
律所至清風起蕭瑟眼昏手顫藝轉工一十五莖稱絕  
筆宋時亦有文湖州畫竹人推第一流能令萬籟起厓  
谷出牆之梢為最優東坡作竹短而瘠別試龍蔥在林  
僻玉堂多暇圖一枝復有小坡能畫石前元作者李仲  
賓琅玕卓立無纖塵薊丘家世不易得父子相傳俱絕

倫吳興學士趙公子飛白之石誰能比水晶宮中春日  
長移得藍枝落窻几後來又有柯丹丘大葉長梢動晃  
旒天顏有喜頻賜予晚節衰颯江湖秋諸公畫竹工畫  
影隔簾彷彿瀟湘景我欲鼓柁游瀟湘碧雲萬頃浮天  
光美人娟娟隔秋水欲來不來空斷腸我來乘風發清  
嘯扁舟直過湘妃廟中流鼓瑟聲鏗鏘和取湖南竹枝  
調何如曩昔行李遊京都故人為我共作翠竹紅梅圖  
原父寫梅君畫竹價重已壓青珊瑚挂在成均之左廡

交遊軒冕觀如堵天上歸來十二年  
紫扉草閣荒山田  
此君風節還依然王君王君聽我語  
我歌長歌君起舞  
花溪水接雙溪長與君百里遙相望  
不如坐君西郊之  
草堂歛坑舊硯楸而蒼鵝溪素練雪色光  
風晴老嫩任  
君寫無使古人專擅場

次何贊府遊壽山詩韻

我昔手持綠玉杖徧觀壽山寺外  
翠律之奇峰天風吹  
我衣雲氣盪我胸峰形峙為五烟霞有路遙相通  
橫秋

雙澗橋影枕寒潭空上有欲落不落之怪石下有半枯  
半活之歌松一峰凌紫霄曙色何瞳矐金雞喚醒海底  
日絕頂尚有蒼涼蹤一峰翠氤氲恍如武陵之景迷西  
東山泉春雨餘流出桃花紅左右一峰若覆釜氣蒸雲  
霧秀所鍾西看瀑泉吼飛雪乃有一峯迴出倒挂虹影  
於晴穹一峰後顧復何似巔巔儼若蟠蛟龍輸青獻翠  
十萬狀並視培塿誇豪雄香爐紫烟遠莫致廬山謾詫  
金芙蓉伊昔當年紫陽翁二三賢俊題名同嗟予寥落

生苦晚不得親陪杖履遊其中  
兜率臺高花雨濛金仙  
趺坐青蓮宮何當復約哦松公  
靈巖石室幽絕處笑揮  
白玉麈尾盡日相過從

章三益匡山行

戊戌後作

仙人休吹紫鸞笙聽我一曲匡山行  
青蓮居士讀書處  
至今石室丹霞明龍泉西南百餘里  
四面崢嶸翠峰起  
先生結菴當畫圖正與匡山景相似  
屋前屋後皆種松  
坐看百尺蒼精龍苔皮深含霜雪古  
鐵榦返走風雲從

一亭下浸蒼波冷縹緲煙雲成萬頃中有神魚長比人  
翠鬢翻動玻璃影一亭上與浮雲齊赤闌干外青天低  
分明投壺笑玉女彷彿出海聞金雞東南一亭隱林樾  
地位清高隔炎熱人間赤日如火流疎簾琅玕自蒼雪  
最其秀者環中亭周遭萬朶芙蓉青朝來爽氣落吾袂  
蘿風吹日天冥冥鶴怨猿驚歸未得繡衣今作青雲客  
故山回首五情搖歸夢時時到寒碧自古山林鐘鼎同  
先生況有前賢風少待功成拂衣去入門依舊山花紅



雨過許叔大

山雨霑衣濕江雲渡水寒也應如杜甫曾此過蘇端綠  
蟻春漿甕青絲野菜盤平居謝拘束與子聲相驩

紅梅

滿林紅雪影參參夜靜和春浸碧潭却憶騎驢二三月  
杏花小雨看江南

暮歸

山腰小路曲如蛇薄暮踈踈雨潤沙醉裏亦知春色老

西風開遍木棉花

明詩綜卷十三